

11/09/1999

Tiga program bahasa akan digabung

KUALA LUMPUR, Jumaat - Gerakan Cintailah Bahasa Kita, Minggu Sastera dan Bulan Bahasa Kebangsaan akan digabungkan ke dalam program "Bulan Bahasa dan Sastera Negara" yang dilancarkan hari ini.

Pengerusi jawatankuasa induk Bulan Bahasa dan Sastera 1999 Datuk Seri Mohd Najib Tun Razak berkata penggabungan semua kegiatan bahasa dan sastera ke dalam satu bulan, dibuat selaras kedatangan abad dan alaf baru.

September dipilih Kabinet untuk diisytiharkan sebagai Bulan Bahasa dan Sastera Negara setiap tahun, bermula tahun ini.

Beliau berkata, program itu bertujuan membina jati diri bangsa Malaysia melalui bahasa dan sastera kebangsaan.

Ia juga, katanya, bertujuan meningkatkan kesedaran dan keyakinan masyarakat mengenai kemampuan bahasa kebangsaan dalam menghadapi era globalisasi.

Di samping itu, program itu diwujudkan bagi mengerat dan memperkukuhkan perpaduan bangsa.

Beliau berkata, program itu juga diterima sebagai salah satu acara dalam 'Perayaan Seabad Malaysia ke Alaf Baru' yang dilancarkan Perdana Menteri, Datuk Seri Dr Mahathir Mohamad, pada malam 30 Ogos lalu.

"Melalui kegiatan seumpama ini, kita berharap dapat menyemarakkan semangat rakyat dalam meningkatkan mutu bahasa dan kesusasteraan kebangsaan kita," katanyadi majlis perasmian program itu, di sini hari ini.

Tema program yang diadakan julung-julung kali itu ialah 'Globalisasi dan Jati Diri'.

Hadir sama ialah Pengerusi Lembaga Pengelola Dewan Bahasa dan Pustaka (DBP), Datuk Abdul Rahim Abu Bakar dan Ketua Pengarah DBP selaku Setiausaha Jawatankuasa Induk BBSN '99, Abdul Aziz Deraman.

Najib berkata, bersesuaian dengan proses globalisasi dan modenisasi yang sedang dilalui pada masa ini, bahasa dan sastera menjadi wadah untuk masyarakat membentuk peribadi dan menyuburkan nilai murni dalam jiwa masing-masing.

(END)